

Hoben y Psicologo a impresionan publico cu nan obranan mahestoso

ORANJESTAD (AAN): Diaranzon anochi den Biblioteca Nacional e exposicion di Sandrick Geerman y psicologo Tony Green a keda habri. E comentario di cada bishitante tabata cu....e obranan ta masha bunita y hopi varia.

Sandrick Geerman ta un hoben estudiante di apenas 18 aña cu no tin mucho tempo ta pintando serio. E hoben aki semper a gusta schets of pinta te cu un juffrouw di school a encurashe pa tuma les di pinta y desaroya su talento. Awor Sandrick a cuminsa destaca caba cu su obranan yen di color y bida. E ta usa mas tanto verf acrylico pa su obranan mahestoso.

Esun cu a sorprende tur hende ta psicologo Tony Green. Nos conoce Tony Green como psicologo, como ex-director di Bushiri y di Colegio EPI, como ex-Presidente di Camara di Comercio, como orador pa charlanan y seminarionan, como productor di Talk Show na television pa hopi a a; y den ultimo a anan como escritor di bukinan. Tur su bukinan ta di un caliber sumamente halto cu a bira bestsellers. Pero, nunca nos por a pensa cu e cabayero aki tin tambe e talento di pinta. Den sala di exposicion nos por a disfruta di mas cu 25 diferente obra cu Green a

pinta riba canvas. Algun di su obranan ta di verf di azeta y algun di verf acrylico.

Loke a capta nos atencion tambe ta cu Green ta usa diferente estilo di pinta. Nos a conta por lo menos cinco diferente estilo di pinta, pero cada uno un berdadero hoyo.

Papiando cu Sandrick, esaki a remarca cu e ta contento cu e por pinta, pasobra esaki ta dune cos constructivo pa haci como hoben pa asina e no tin tempo pa e vicionan cu hopi biaha hobennan ta cai aden. E hoben a menciona cu su bida a cambia y cu e ta determina pa biba un bida sano.

Sandrick tambe tin un variacion di pinturanan di bida aquatico, cultural, y di naturalesa.

Un di e tipo di pinturanan cu Green ta gusta pinta, segun e, ta pinturanan silhouette. E estilo aki ta exige hopi skill y pacenshi.

E exposicion ta sigui habri Dialuna te cu Diabierna dia 19 di Juni.

Horario ta di 10:00 pa 12:00 di mainta, y di 2:30 pa 7:30pm. Diamars cu Diahuebs e ta cera 4:30pm. Tur hende ta bon bini pa mira y experencia un exposicion asina interesante. Entrada ta gratis. Nos ta considera e exposicion aki un "Must-See" evento. Trece bo yiunan y tur hoben pa mira kico un hoben ta haci den su tempo liber!